

**MESYUARAT PERTAMA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
17 APRIL 2020**

PERKARA : 5(B)(II)15

**SOALAN BERTULIS OLEH AHLI KAWASAN JAWI
YB. H'NG MOOI LYE**

15. Inisiatif Kerajaan Negeri Pulau Pinang memperuntukkan sejumlah RM7 juta di bawah Pakej Bantuan Rakyat Pulau Pinang.
- (a) Adakah hanya peniaga yang berlesen untuk memohon bantuan ini?
 - (b) Apakah langkah yang diambil oleh Kerajaan Negeri Pulau Pinang untuk menjaga kebajikan peniaga di tepi jalan supaya golongan peniaga itu tidak terlepas dalam bantuan?

**YB. JAGDEEP SINGH DEO A/L KARPAL SINGH
MENJAWAB BAGI PIHAK Y.A.B. KETUA MENTERI**

15. Y.A.B. Ketua Menteri telah mengumumkan Pakej Bantuan Rakyat Pulau Pinang pada 25 Mac 2020 sebagai usaha Kerajaan Negeri untuk membantu golongan yang paling terkesan dalam tempoh Perintah Kawalan Pergerakan (PKP) seperti golongan penjaja dan peniaga berlesen. Sejumlah RM7 juta telah diperuntukkan di bawah Pakej Bantuan Rakyat Pulau Pinang bagi pakej bantuan tunai *one-off* RM500 kepada 14,012 orang penjaja dan peniaga kecil berlesen.
- (a) Bagi pakej bantuan tunai *one-off* RM500 kepada penjaja dan peniaga kecil berlesen, Kerajaan Negeri Pulau Pinang pada ketika ini sedang menyalurkan bantuan tunai secara *one-off* berjumlah RM500 kepada semua penjaja dan peniaga kecil yang berlesen dengan Majlis Bandaraya Pulau Pinang

(MBPP), Majlis Bandaraya Seberang Perai (MBSP) dan peniaga di bawah kelolaan FAMA.

- (b) Kerajaan Negeri amat prihatin terhadap nasib golongan penjaja yang kehilangan pendapatan dalam tempoh Perintah Kawalan Pergerakan (PKP). Bagi meringankan beban golongan penjaja ini, Kerajaan Negeri telah memberikan bantuan tunai secara *one-off* berjumlah RM500 kepada semua penjaja dan peniaga kecil berlesen di Pulau Pinang. Bantuan ini juga merangkumi peniaga pasar malam, pasar tani dan kendera saji (*food truck*).

Kebanyakan penjaja di tepi jalan tidak mempunyai lesen dengan Pihak Berkuasa Tempatan (PBT). Oleh yang demikian, pihak PBT sukar untuk membuat pengesahan samada penjaja tidak berlesen ini sememangnya menjalankan aktiviti perniagaan ataupun tidak. Untuk itu, bantuan tunai secara *one-off* berjumlah RM500 hanya diberikan kepada penjaja dan peniaga kecil yang berlesen dengan PBT sahaja.

Selain daripada itu, Kerajaan Negeri melalui kedua-dua PBT iaitu MBPP dan MBSP turut memperkenalkan inisiatif jualan makanan dalam talian untuk membantu penjaja dan peniaga kecil. MBPP telah menyediakan satu platform berkonsepkan perniagaan secara atas talian Jom Beli *Online* @ MBPP, bagi membantu peniaga dan penjaja kecil yang terjejas dengan pandemik COVID-19. Platform berkenaan adalah mesra pengguna kerana tidak perlu memuat turun sebarang aplikasi, sebaliknya hanya perlu melayari laman sesawang MBPP dan membuat pesanan makanan menerusi pautan projek Jom Beli *Online* @ MBPP. Sebagai permulaan, inisiatif ini akan menumpukan kepada para peniaga Kompleks Makanan MBPP sahaja, dan seterusnya akan diperluaskan kepada peniaga bazar Ramadan serta pasar awam.

MBSP pula sedang membangunkan portal eBazar Ramadan bagi membantu peniaga meneruskan perniagaan melalui dalam talian. Dalam portal berkenaan, semua peniaga di Seberang Perai yang mempunyai laman sosial antaranya Facebook dan WhatsApp akan didaftarkan dan jualan mereka akan dimasukkan ke dalam e-Katalog Bazar Ramadan yang boleh dipilih oleh pengguna.

Portal tersebut akan memberi peluang kepada semua peniaga yang terkesan dengan Perintah Kawalan Pergerakan (PKP) untuk mencari rezeki pada Ramadan ini. Penjaja dan peniaga kecil yang berminat boleh melayari laman sesawang MBSP untuk menyertai e-Katalog Bazar Ramadan ini.

Kerajaan Negeri turut menggalakkan pihak swasta dan akademik yang ingin memberikan idea dan sumbangan bagi membantu golongan penjaja dan peniaga kecil untuk tampil ke hadapan dan bersama-sama Kerajaan Negeri meneroka kaedah baharu pasaran bagi penjajaan dan perniagaan.